



輪椅頂个望想

在這恬靜个朝晨頭，日頭行到半天高，對面公園頂个茄苳樹下，一群坐在輪椅頂个老人家，你看佢、佢看你，就像逐輛停到兼兼个輪椅、憑共下个凳仔，恬恬無講半句話。脣頭一群看護嘅哩呱啦，就像樹頂个屋簷鳥樣講毋會煞，佢詳細摻佢聽，該來自印尼、越南个母語，一時也聽毋識佢兜在該講麼个。

坐在輪椅頂个阿光伯姆，一生人摻阿光伯在田頂絡食。跔等時節，種兜番薯、芋仔、番豆、包粟、蘿蔔仔；乜種兜仔大菜、芥藍菜、白菜、蕨、西洋瓜苳；還有荷蘭豆、明豆、長豆仔、雪豆這兜；當然苦瓜、瓠仔、番瓜、菜瓜、冬瓜這兜，跔等時節，也加加減減種兜仔。係講毋係腳膝頭毋好去開過刀、又開來無異順序，佢想阿光伯姆這下乜還在田頂無閒啊！哪會在輪椅頂坐等，分看護撻到該茄冬樹下奈涼？田頂正係佢做事、生活个地方！恤著佢同老公對結婚第二日開始，就共下在田頂、菜園種這種該，一生人搭泥卵，乜畜大哋三個細人仔。

阿光伯姆个三個細人仔，做盡係俵仔，各各都有頭路。大个俵仔上班食人家个頭路，第二个開過汽車修理、保養、檢驗廠，盡細个俵仔，係人像畫家，透長年在鬧熱个桂花巷、永昌宮廟面前，為來遶寮个人客畫Q版个人像畫，傳神个畫像，人客都當肯定。阿光伯姆無愁俵仔有頭路無，就愁佢兜無婆無卵！三個俵仔，這下既經有五、六十歲哩！都言有結婚，將來佢兜係無討舖娘就像羅漢腳(kaˊ)樣，毋知仰結煞正好？

像阿光伯姆恁樣个老人家，總係想往下！在爺哀个心肝肚，細人仔就係細人仔！就算係五、六十歲仔，還係細人仔！老古人講，爺娘想子長江水，子想爺娘擔竿長，還講子想爺娘無該一廿(ngiam)長！阿光伯姆，這下毋會做哋，還愛人服侍，又還愛為著自家三個俵仔來想，心肝肚个艱苦，毋知屋下人知無？阿光伯總係安慰自家个舖娘，一枝草自有一點露，兒孫自有兒孫福，毋使想恁多，想恁多乜無法度照自家个意思來行！

係啊！姻緣言到強求乜毋得，無該姻緣也強求毋著！過好自家目前个生活正係盡重要个事情。三個俵仔雖然無婆無卵，毋過有自家个頭路、自家个生活；兩老仔好好仔過自家个生活，阿光伯姆養好自家个身體比麼个就較重要。

茄苳樹下，坐在輪椅頂頂，恬恬無講話个阿光伯姆，當像聽著有人恁樣勸話佢。

作者：邱一帆

☆詞彙學習☆

- 【西洋瓜苳】xiˊ iongˊ guaˊ ximˊ：龍鬚菜。【羅漢腳】loˊ hon kaˊ：單身漢。
 【搭泥卵】kag naiˊ lonˊ：原指捏泥團，引申為靠耕作生活。【想往下】xiongˊ gongˊ haˊ：為子女後輩著想。
 【做盡】zo qinˊ：全然。【一廿】idˊ ngiam：拇指和食指伸展開來的距離。
 【無婆無卵】moˊ poˊ moˊ lonˊ：沒有老婆、子女。【勸話】kien va：奉勸。